

Na osnovu člana 22. Zakona o Vanjskotrgovinskoj/Spoljnotrgovinskoj komori Bosne i Hercegovine ("Službeni glasnik BiH", broj 30/01 i 72/13) i člana 46. Statuta Vanjskotrgovinske/Spoljnotrgovinske komore Bosne i Hercegovine ("Službeni glasnik BiH", prečišćen tekst broj 52/14 i 19/18), Skupština Vanjskotrgovinske/Spoljnotrgovinske komore Bosne i Hercegovine, na sjednici održanoj 17.12.2025. godine, donijela je

ODLUKU

O ČLANARINI VANJSKOTRGOVINSKOJ/SPOLJNOTRGOVINSKOJ KOMORI BOSNE I HERCEGOVINE ZA 2026. GODINU

I Opšte odredbe

Član 1.

Ovom odlukom propisuje se osnovica, stopa, način plaćanja i druga bitna pitanja vezana za članarinu koju članovi plaćaju Vanjskotrgovinskoj/Spoljnotrgovinskoj komori Bosne i Hercegovine u 2026. godini.

Član 2.

Članstvo u Vanjskotrgovinskoj/Spoljnotrgovinskoj komori Bosne i Hercegovine (u daljem tekstu: Komora) je na osnovu člana 3. Zakona o Vanjskotrgovinskoj/Spoljnotrgovinskoj komori Bosne i Hercegovine obavezno za sva privredno-pravna lica registrovana u Bosni i Hercegovini za obavljanje poslova sa inostranstvom.

Iz sredstava obrazovanih po osnovu članarine finansiraju se aktivnosti Komore, kao samostalne, nevladine, nepolitičke i neprofitne asocijacija privrednih subjekata.

Član 3.

Privredno-pravno lice (u daljem tekstu: član) je u obavezi izmirivati članarinu Komori po jednom od sljedeća dva kriterija:

- 1) realizovanog uvoza ili
- 2) bruto plate zaposlenih.

Član 4.

Članu Komore može se obračunati članarina samo po jednom od kriterija iz prethodnog člana.

Član 5.

Maksimalna mjesečna članarina utvrđena pojedinačnom članu ne može biti veća od tri prosječne neto plate u BiH isplaćene u 2025. godini, prema službenim podacima Agencije za statistiku BiH.

Minimalna mjesečna članarina iznosi 25,00 KM.

II Članarina po osnovu realizovanog uvoza

Član 6.

Članu Komore kojem se članarina obračunava po osnovu realizovanog uvoza, zadržava se isti obračun godišnje članarine kao za prethodnu godinu.

III Članarina po osnovu bruto plate

Član 7.

Banke, osiguravajuća društva, privredno-pravna lica iz oblasti građevinarstva i privredno-pravna lica iz oblasti prometa, komunikacija i usluga (drumski transport, željeznički transport, vazdušni transport, djelatnost putničkih agencija i turoperatora, poštanske aktivnosti, telekomunikacije i ostale prateće djelatnosti, te ostale kompanije koje ostvaruju prihod po osnovu usluge u inostranstvu), kao i drugi članovi Komore kojima se članarina ne obračunava u skladu sa članom 6. ove odluke, plaćaju godišnju članarinu koja se obračunava u odnosu na bruto platu.

Naučnoistraživačke i obrazovne institucije, udruženja građana koja u svojoj registraciji imaju privrednu djelatnost, savezi, interesne asocijacije, fondacije, zadruge i druge organizacije koje obavljaju djelatnost od značaja za privredu, kao pojedinačni ili kolektivni članovi, koji su članstvo u Komori stekli u skladu sa članom 6. stav (4) i (5) Statuta Komore, plaćaju godišnju članarinu koja se obračunava u odnosu na bruto platu.

Osnovica za obračun članarine iz ovog člana je iznos bruto plate iskazan u završnom računu kod nadležne institucije za 2025. godinu (Finansijsko-informatička agencija Federacije BiH, Agencija za posredničke, informatičke i finansijske usluge Republike Srpske i Distrikta Brčko). Stopa članarine iz ovog člana iznosi 0,2 %.

IV Minimalna članarina i umanjeње

Član 8.

Član Komore koji je osnovan u 2026. godini nije u obavezi plaćati članarinu za 2026. godinu. Član Komore kome članarina nije utvrđena u skladu sa članom 6. i 7. ove odluke, plaća minimalnu mjesečnu članarinu u iznosu od 25,00 KM, odnosno 75,00 KM kvartalno.

Član 9.

Članu Komore koji je u iskazanom ukupnom prihodu za 2025. godinu ostvario više od 50% po osnovu prihoda na inostranom tržištu (izvoza), obračunato zaduženje članarine se umanjuje za 20%.

Umanjenje članarine vrši se na osnovu zahtjeva člana Komore, uz koji se dostavlja Bilans uspjeha za 2025. godinu.

Član 10.

Članu Komore koji obavlja lohn posao, odnosno ostvaruju uvoz radi izvoza, obračunato zaduženje moguće je umanjiti na njegov zahtjev, uz koji se dostavlja dozvola za obavljanje lohn poslova u 2025. godini, izdata od Uprave za indirektno oporezivanje Bosne i Hercegovine, i PDV prijave za 2025. godinu koje dokumentuju vrijednost uvoza, kao osnovicu za obračun.

Član 11.

Upravni odbor, zbog opravdanih razloga, na zahtjev člana Komore može donijeti odluku o umanjenju visine i načina plaćanja članarine.

V Način plaćanja

Član 12.

Član Komore vrši plaćanje članarine na osnovu obavještenja o osnovici i visini članarine koje mu Komora dostavlja posebno za svaki kvartal.

U slučaju da je članarina pogrešno utvrđena, na zahtjev člana Komore i uz dostavljene dokaze, generalni sekretar će izvršiti korekciju članarine.

Uplata članarine po osnovama propisanim ovom odlukom vrši se na račune Komore koji se vode kod poslovnih banaka.

VI Završne odredbe

Član 13.

Generalni sekretar Komore je ovlašten da angažuje sredstva u cilju pribavljanja podataka za obračun članarine od institucija koje raspolazu zvaničnim podacima, odnosno od pravnih lica čije podatke su verifikovale zvanične institucije.

Član 14.

Ako Skupština Komore u 2026. godini ne donese odluku o članarini za 2027. godinu, primjenjivaće se Odluka o članarini za 2026. godinu, do donošenja odluke o članarini za 2027. godinu.

Član 15.

Stupanjem na snagu ove odluke prestaje da važi Odluka o članarini Vanjskotrgovinskoj/Spoljnotrgovinskoj komori Bosne i Hercegovine broj: 01-1-01-1-1236-6/24 od 13.12.2024. godine ("Službeni glasnik BiH", broj 91/24; „Službene novine Federacije BiH", broj 104/24; "Službeni glasnik RS", broj 4/2025; "Službeni glasnik Brčko Distrikta BiH", broj 9/2025).

Član 16.

Ova odluka stupa na snagu i primjenjuje se od 1.1.2026. godine, a biće objavljena u "Službenom glasniku BiH", „Službenim novinama Federacije BiH", "Službenom glasniku RS", "Službenom glasniku Brčko Distrikta BiH" i na web stranici Komore.

Broj: 01-1-01-1-1320-4/25
Datum: 17.12.2025. godine



